

搜腸集

八月十六子夜遊成功湖賦得秋懷

少年心事已無窮，況見殘紅著水中。
此際人間誰未寐？多情明月薄情風。

過大內故宅偶成

終南可是長居地？祇合閒心偶獨登。
況有千絲今不絕，山人未必即山僧。

車中偶成

曠逸長風曙，飄然欲比仙。
和光開紫闕，雲日駕青圓。
鳥去澄空闊，窓橫綠野懸。
故園胡復見？回望祇飛煙。

咖啡

汝是西來客，吾為北返人。
相逢非晚夜，知識始佳晨。
苦此杯中子，怡然座上身。
感君終不棄，助我爽精神。

夜讀長慶集春雪詩有感

南國風光異，毋將六出來。
襲人時凍雨，拂面久寒埃。
偶讀微之句，偏思道韞才。
會當春漸秀，飛絮傍城開。

卯時望遠偶成

雞鳴人未寢，極目故皇州。
玉屑出玄幕，氤氛生遠樓。
丹霞東陸漸，銀月曉山收。
一縷孤鴻影，陶然肯忘憂。

送某生之舊京

送君之舊京，歧路闇傷情。
滄海能無阻，烽煙肯盪平？
六朝雲雨闊，三楚玉盤明。
代問秦淮水，曾如故日清？

濁水溪道中

熱官非所得，淒苦度溪身。
筇笻藏歸夢，青衫暖別人。
謫仙聽兩岸，少府望三秦。
雁舞離群跡，車馳濁水濱。
風光停日久，梅柳入窗新。
花木浮春氣，皓空凌素塵。
荒疇迷古徑，原草沒飛輪。
待側何年足？堪堪結逸民。

南歸道中偶成

遊子酸然緣底事？頻年座上履蓬萊。
暮隨斜日西南反，朝見疎雲東北來。
苟羨玄言三語掾，愧無神筆五般才。
寄身惟結扁舟願，想得陶朱髮半皤。

書懷二首時任學生會職

其一

毋寧曝背對長天，碌碌而今二十年。
但覺官微飢不救，獨知心病疾難全。
貪圖校尉嚙佳釀，企羨陳搏得好眠。
兩眼玄花休自起，昏昏一笑恁愚賢。

其二

人間轉轂便輕寒，豈得蓬萊壁上看？
作吏誰言乘鶴易，抱憂儼覺護林難。
相逢世事兼家事，政爾春闌直夜闌。
屐齒從今悲莫算，卻聽金縷候君彈。

南歸放遊偶成

南冠偶覺南鄉好，二月驕陽偃地來。
鯤北涼雲方滿目，故都春氣正盈杯。
參差暇景悠然得，取次花間散漫徊。
長願平生閑且僻，醉吟樗種不需栽。

聞城中驟雨有感

夜半書堂聞玉磬，錚錚瓦上動深沉。
無端一抹浮雲淚，有思頻年客子心。
火宅牛車¹安自遠？桃源故徑已難尋。
平生久臥黃粱枕，偶向人間付短吟。

二月廿二見明日高懸有作

雨動風搖三宿合，斷雲孤去日高懸。
分明春訊生詩卷，顛倒花光落眼前。
青帝空回黃鳥息，韶華錯付白頭年。
客城淹久人多病，感物從今覺可憐。

八韻偶成

大壽嚴霜底，光華詎久持？
紅桃生麗質，黃柳有纖枝。
同發陽春日，俱零梅雨期。
哀哉花易落，已矣木難支。
為樂當年少，貪歡勸及時。
世情終奄忽，薄命絕如斯。
試看名兼利，不過嗔與痴。
可憐朝露影，竟夕殞身姿。

¹ 《法華經》：「三界無安，猶如火宅，眾苦充滿，甚可怖畏。」、「有大白牛，肥壯多力，形體殊好，以駕寶車。多諸僮從，而侍衛之，以是妙車，等賜諸子。諸子是時，歡喜踊躍，乘是寶車，遊於四方。嬉戲快樂，自在無礙，告舍利弗，我亦如是。」。